

卷四十六

書名 藝文類聚一百卷
 嘉靖中天水胡纘宗刊本
 撰者 唐 歐陽詢 撰
 卷 卷四十六
 內容分類 子 類書 彙考 唐五代
 索書號 子部 類書 2
 編號 C5912500

藝文類聚卷第一

唐太子率更令弘文館學士歐陽詢撰

天部上 天 日月星雲風

天

闕易曰 哉乾元萬物資始乃統天雲行雨施品物流形大明終始六位

時成時 六龍以御天乾道變化各正性命 又曰立天之道曰陰與陽

又曰天 健 尚書曰乃命羲和欽若昊天 又曰皇天震怒命我文考

肅將天 禮記曰天地之道博也厚也高也明也悠也久也日月星辰

繫焉 論語曰天何言哉四時行焉百物生焉 老子曰天得

一以 春秋繁露曰天有十端天地陰陽水土金木火人凡十端天亦

喜怒 樂之心與人相副以類合之天人一也 爾雅曰穹蒼蒼天

也春 夏為昊天秋為旻天冬為上天 春秋元命苞曰天不足西

北 故天周九八十一萬里 渾天儀曰天如雞子天大地小


地各乘氣而立載水而浮天轉如車轂之運 黃帝素問曰

彩色首頁1

東洋文化研究所漢籍目錄 編號: C5912500
 東洋文化研究所漢籍目錄所藏漢籍善本文影像資料庫 索書號: 子部 類書 2
 漢籍善本文影像資料庫文本藝文類聚一百卷 嘉靖中天水胡纘宗刊本
 版權所有: 東京大學 東洋文化研究所
 使用上的注意事項



東方文化學院東京研究所
No. 41







藝文類聚卷第四十六

職官部二 太尉 太傅 太保 祭酒 博士

太尉

春秋合成圖曰堯坐身中與太尉舜臨觀鳳皇授圖 史記曰孝惠帝六年置太尉官 百官表注曰太尉古官也自上安下曰尉故武官以為號 月令曰孟夏太尉贊俊傑遂賢良 漢書百官表曰太尉秦官金印紫綬 掌武事周勃灌嬰周亞夫等為之 漢書曰呂后問高祖曰陛下百歲之後蕭相國既死令誰代之上曰曹參可其次曰王陵可然少穎陳平可以助之陳平智有餘然難獨任周勃重厚少文然安劉氏者必勃也可令為太尉 又曰王龔為太尉在位自非公事不通州郡書記其所辟命皆海內長者 東觀漢記曰張輔字益侯為太尉父尚在輔每遷轉乃一到洛父來適會正臈公卿罷朝俱賀歲奉酒上輔父壽極歡莫不嘉其榮 又曰鄧彪字智伯為太尉在位清白公廉 謝承後漢書曰京兆朱寵字仲威為太尉家貧食脫粟飯卧布被朝廷賜錦被梁肉皆不敢當 又曰鄭

弘為臨江太守行春有兩白鹿隨車夾轂而行弘怪問主簿黃國鹿為吉凶國拜賀曰聞三公車圖畫作鹿明府當為宰相後弘果為太尉舉第五倫為司空班次在下每正朔朝見弘曲躬自卑上後置雲母屏風分隔由此為故事續漢書曰太尉公一人掌四方兵事功勤歲盡則奏其殿最而行賞罰凡郊祀之事掌亞獻袁山松漢書曰太尉劉虞讓位於羊續靈帝時為三公者皆輸禮錢千萬續舉褐袍以示之曰臣之有唯此而已遂不代虞華嶠後漢書曰安帝即位太尉徐防以災異寇賊策免就國凡三公以災免始自防也范曄後漢書曰曹嵩靈帝時貨賂中官及輸西園錢一億萬故位至太尉應劭漢官儀曰章帝詔曰司空平融典職六年勤勞不怠其以融為太尉錄尚書事又曰沖帝丁酉策書太尉趙峻二世掌典機衡有匪石不貳之心大司農李同公族之苗忠直不固有史魚之風今以峻為太傅同為太尉與大將軍翼參錄尚書事幽明錄曰常山張顥為梁相天新雨後有鳥如鵲飛翔稍下墜地民爭取即化為一圓石顥推破之得金印文曰忠孝侯印顥表上聞藏之祕府顥漢靈帝

時至太尉齊職儀曰魏文帝黃初二年日食奏免太尉賈詡詔曰天地之災害罪在朕躬勿貶三公遂為永制而太尉華歆以疾依田千秋故事乘輿上殿大會遣散騎常侍繆襲請歆百官摠已聽歆至後漢蔡邕太尉陳公贊曰公在百里有西產之惠賜命方伯分陝餘慶餘慶伊何兆民其觀少者是懷老者是安綱紀文王文王用平東督京輦京輦用清乃登三事三事衣寧契稷之佐具于堯庭今則由古於穆誕成後漢漢崔駰太尉箴曰天官冢宰庶僚之師師錫有帝命虞作尉苟非其人戮我帝載昔周人思文公而召南詠甘棠昆吾隆夏伊摯盛商季世頗僻禮用不臣後漢蔡邕楊太尉碑銘曰於戲公惟岳靈天挺德翼赤精神氤氳仁哲生應台任作邦禎帝欽亮訪典刑道不忒迄有成光遐邇穆其清又楊太尉碑銘曰天鑒有漢挺生元輔世作三事勲在王府乃及伊公克光前矩悉心畢力胤其祖武化洽羣生澤霑區宇又太尉李咸碑銘曰天垂三台地應五岳降生我公應鼎之足弈世載德名昭圖錄既文且武相相紹續外則折衝內則大麓又太尉橋玄碑曰岐嶷而超等總

角而逸羣至矣乎初紳高明卓異爲衆傑之雄其性莊疾尚華樸有折而不撓拔賢如逝流討惡如霆擊至德在已揚之由人苟不矯迹夫何舍焉後漢栢麟太尉劉寬碑曰公誕受純和之氣體有樂道寧儉之性疾雕飾尚樸素輕榮利重謙讓劣與同好鑄墳典於茅廬是以根經緯綜精微誨童冠而不倦遷南陽太守推貞諒以示下顯衆善以厲否惻隱之誠通于神人故去鞭朴如獲其情弗用刑如弭其姦 晉孫綽太尉庾亮碑曰次黃中以啓曹鍾遐武於軒轅爰及晉代世號多士公吸峻極之秀氣誕命世之深量微言散於秋毫玄風暢乎德音闢門者貴其疑峙入室者議其通玄標形者得之廊廟悟日者期諸濠川提挈南翔息肩靈越會大君有命納妃德門自求多福辭不獲已鳳羽籠于華樊麟趾繫于椒房王敦阻兵翫權志闕神器乃轉公左衛將軍要雄戟以扶華轂勒武旅以翼豹尾死難之心義形于色親受中詔奔告方伯於是羣后契盟同稟高謀巖樓懷德以嚮赴義拯神器於獸吻扶帝座於已傾王室之不壞翳伯舅是賴公以爲戰伐之謀仁所耻聞況立德弘道年幾不惑闔明沈舟將遠迹山

海詔累遣侍中黃門逼以嚴制知不獲免乃固求外任江外無烽燧之警宇內歸穆然之美銘曰金德時昏乾綱絕紀素靈南映中宗蔚起誰其贊之數鍾伊公達人忘懷形隨運通再潛再躍婉若游龍 梁沈約齊太尉王儉碑銘曰瞻且奭而齊軫軼夔龍而長驚百辟翹首譬列宿之仰望舒千里結轍若派流之宗江漢及宋道盛運鼎命將改而瞻鳥所集未知適歸公高卧閑宇獨咤虛室眷龍顏以託夢詠日角以興言 任傳巖之下懷滋水之上慨深版蕩念在濡足霸君亦慮屬一匡情降三顧卜匪熊羆唯人是與公深覩典廢妙識人英察榮光於河渚攀龍翼於雲漢傾方寸以奉國志七尺以事君殊文共會異軫同歸堆案盈几充庭滿室隨方引應斷決如流辭不輟響紙無停筆精明外朗神彩傍映矚矚接其光景風雲溢乎帷席囂喧揔至大薄相填齊鑣共軫並而不雜銘曰 愷公赫矣世載經綸四彼三傑六茲五臣德參世命道亞如仁徒步金門 濯纓蘭疇激水上征倍帆鸞起 陳沈炯太尉始興昭烈王碑銘曰古者帝王之興莫不崇建親屏泰伯讓而退封武哀終而受號則有之矣至若勒功昇駕銘德

太常清廟尊乎國家揚名顯乎子弟在昭烈王見之焉若夫鳩水遙源石
磬遐集五絲作而詠南風八世興而和鳴鳳籍帝王之基居正卿之族有
由來矣孔融汝穎之論許其少多傳暢諸公之書頗有賢哲自漢至魏涉
江而東繇邈蟬聯言之者舊皇上革命應運大啓邦國麟趾盤石之宗固
宣金楨玉幹之戚畢封文叔掩被之悲無泯仲謀援鞍之勸逾功乃封始
興郡王永定元年下詔曰天倫所感義本因心名器追崇則惟恒典已兄
梁故南兖州刺史長城縣公德範沈邃風度寬厚性與天通深乎靡測昔
彈冠入仕譽重城華宣力艱難遂顧洪業雖時非季漢勢異相王海內挹
其嗣生民懷其大德者矣朕受天明命爰膺寶曆言尋永徂與慕增懷可
奉贈太尉公昔之密戚近親宗英令德若河間之不羣沛獻之受象東平
之樂善陳恩之澡麗實聞之也未有身死忠貞名存前代若王之義烈者
銘曰稽古帝舜重瞳有裔曰陳祚土慕虞之系騰波汝穎承流鳩水四岳
有後六奇獻計惟寔惟忠卿長羣公浮舟震澤佳氣葱葱岐周七十商臺
百里婉婉中陽帝出攸止太常景皇李孫讓子天下不踐間之惇史八孝

出忠清輝何已苞指周藏風流懿德言爲世範行成士則名山可鑄豐碑
易勒惜哉往矣殞身凶慝鼎命既遷山河是始光啓代郡德表永祀周以
別功魯侯戾上禮茂廟堂恩加松柏墓志梁沈約齊太尉文憲王公墓
志銘曰德被九官功苞十亂帝圖必舉皇猷諧煥斯謂國楨是惟民幹翔
翔禮困優遊文館秘篆煙瀟壞辭雨散揆路揚輝台庭改觀方朔隆平變
茲天綱福履每愆降年多爽微言永謝庶僚誰長鏡吹罷音松風代響
梁沈約齊太尉徐公墓誌曰公美風儀善言求愛重樛基流連情賞拓宇
東郊駿然閑素榮貴之來無慙懷抱任居端揆萬務同歸簿領盈前囂塵
滿席直舉枉錯虛來實及天道不仁與善塞應北齊邢子言太尉韓公
墓誌銘曰立事立言是爲勿替且公正德實亨不朽雖將相無種而公卿
有門是以萬種四牡曷奕於往代長組高冠陸離於前祀及負笈追倍結
友從師先難後易身佚功倍皆神遊隅隩理合精微非存甯越廢寢食以
存道久殊高鳳忘冠履以成業皎皎獨照旁絕囂滓亭亭孤出入首雲霞
志情譽毀同嗣宗之於善惡齊心得喪若叔夜之於愠善方將受在三九

追蹤二八弘大道以事一人敷至理以安百姓而天德不厚神聽多愆仁
勇一亡辯智同盡 晉盧謀太尉劉公誅曰公侯之生固天攸擢高智蕭
條英風卓犖操宏壯抗意崇邈雅用深 明鑒朗出摘藻雲浮飛辯益
溢驅其豺狼斬其藜藿建立市朝營置亭徽劉耻南北猗盧北接或以恩
燮微我公侯方事焉捷委重于外弛禦于中制比鄧禹禮優賈融 梁
王僧孺爲臨川王讓太尉表曰臣聞一 以長望千里而成累空輸易騁
觸三天而不登苟曰違方難用適遠安車駟馬望高闕而朝至繡服緹麾
輜康衢而暮返行瞻盡瘁居對蒼龍陛下海涵春育日鏡雲伸追大道之
無私惜微臣之宜極 後魏温子昇西河王謝太尉表曰臣聞拂羽決起
力謝摩天策蹇載馳功微送日將短融難以陵高鶩乘無由致遠雖復建
極出郡未追楚趙之風捧壺入侍徒踵金張之迹及天祚明德運啓興王
六遂始遷九鼎初定於焉承之有用當官草靡從風未遑克讓常恐執轡
輕輪操刀傷錦

太傅

大戴禮曰傅傳德義 又曰天子不忠於庶民不信於諸侯不戒於戎事
不誠於賞罰凡是之屬太傅之任也 尚書曰成王黜殷命滅淮夷歸豐
作周官立太師太傅太保茲惟三公訓道經邦燮理陰陽官不必備惟其
人 賈誼書曰昔文王使太公望傅太子發嗜鮑魚而公不與文王曰發
嗜鮑魚何爲不與太公曰禮鮑魚不登平俎豈有非禮而可以養太子哉
事具諸 東觀漢記章帝詔曰行太尉事衛尉趙喜三世在位爲國元老其
以喜爲太傅 續漢書曰每帝初即位置太傅錄尚書事薨輒省 應劭

漢官曰太傅古官也周成王康叔爲之高后元年初用王陵金印紫綬八
年省哀帝元壽二年復置位在三公上世祖中興特遣使者備禮徵故客
令南陽卓茂策曰夫士誠能爲人所不能爲名冠天下當受天下重賞故
武王誅紂封比干之墓表商容之閭今以茂爲太傅封宣德侯 曹植輔
臣論曰蓋精微聽察理析毫分規矩可則阿保不傾羣言系于口而研撫
是非典誥摠乎心而唯所用之者鍾太傅也 齊職儀曰太傅品秩冠服
同太宰成王即位周公爲太傅遷太師秦無其職漢惠帝崩呂后以右丞

相王陵爲少帝太傅位在三公上魏黃初七年詔太尉鍾繇爲太傅華歆
爲太尉並以疾依田千秋乘輿上殿後三公有疾多以爲準沈約宋書
曰晉宣帝爲魏太傅誅曹爽後置左右長史祿屬各十人人事既非常
加又領兵非准例也箴晉齊王攸太傅箴曰伊昔上皇建國立君仰觀
天文俯察地理創業恢道以惠于民承祀祚延統重故援立太子尊以弘
道固以貳已儲德既立邦有所恃固親以道勿固以恩修身以敬勿託以
尊自損者有餘自益者彌昏碑後漢蔡邕太傅胡廣碑銘曰用能七登
九命篤受分祉亮皇聖於六世嘉庶績於九有窮生民之光寵享黃耇之
遐紀蹈明哲以保身與福祿于終始五蹈九列七統三事和神人於宗伯
治水土于下台光弼六世曆載三十自漢興以來昂臣元輔未有若公者
焉觀臯陶之闡壺究孔氏之房輿通水泉於潤下繁后土於稼穡訓五品
於羣黎理人倫於區域曜二辰于混元協太和乎皇極傳聖德於幼冲率
且真之奮職晉孫綽太傅褚褒碑曰公資清剛之正氣挺純粹之茂質
深量體於自然冲識足乎弱冠含章內映而不運儼察之明玄識沈通而

不以浮藻曜物穆然忘容塵務不干其度默爾獨得膚受莫測其奧加以
溫恭孝友少思寡欲都督兗州刺史將以藩屏畿甸級授分內會稽太守
駕太后臨朝摠已之重民無異望乃徵將軍中書令錄尚書事公要終之
識定於介石雖事已未來而情以本應顧以主少國危方難未夷思清函
夏以一天字且帝命所存以社稷爲寄謀身雖重方此爲輕深爲意疾俛
首撫順公志在芟夷兇類拯拔晉民繕甲鍊卒日不暇給者又矣遂見機
而作遺其劔履將龍馬河洛電掃司豫廟筭以逆徒尚繁困獸難逼命公
還旆以俟齊舉雖元勳未捷義聲亦足以振暴於華夷矣銘曰邈邈遠遊
臺臺令圖將激淮海灑滌中區雅業未究哲人其徂敢勒玄石敬刊高謨
晉孫楚故太傅羊祜碑曰稟二儀之純靈膺造化之冲氣文爲辭宗行作
世表遷黃門侍郎受秘書監公筭滅吳之略以爲孟獻營虎牢而鄭人懼
晏弱城東陽而萊子服乃進據險處開建五城收膏腴之地奪敵人之資
於是江浦馳義襁負而至雖研精軍政用思滅敵然兼立學校闡揚典訓
是以搢紳之士鱗集仰化雲翔衙門雖泮宮之詠魯侯菁莪之美育才無

以過也銘曰金德發曜惟公作輔肇造嘉謨建我民主不慙遺公俱屏聖
皇哲人其徂孰不增傷 周王褒大傳燕文公于謹碑銘曰古者六等官
人師傅崇其匡輔一命作牧侯伯揔其專征南仲成薄伐之功吉甫作來
歸之頌若乃仰叶宸曜上屬台階錫之以彝器明之以車服除名盛業太
傳燕國公其有焉西擘開其命緒東海傳其世祿父曾致平法之科死尉
稱無冤之頌駟馬方駕高門繼軌公稟山岳之上靈含風雲之秀氣雕良
玉於廉劇鍊貞金於鑿釜于時王業締構國步權輿太祖地雖二分功猶
再駕忠誠簡帝有志興王公運策惟帳參謀幕府封齊定文成之計聞楚
資曲逆之奇仲華訪輿地之圖林水參兵車之右魏恭帝元年為大司寇
正刑糾慝國無害馬之倫翦暴詰姦民亡餘羊之俗三刺薦無簡之文兩
造陳禁邪之憲大周受命寶歷攸歸表高惠之功臣紀山河之著命封燕
公邑萬戶姬氏建國君奭始封昭王禮賢郭隗開館又授太傅本官如先
保定五年賜金石樂一部公世為邊將少習兵書當敵制機臨戎應變
壘滅龜之圖題樹繫桑之略軍中罷戰無廢雅歌壯士志驕時觀投石及

平名高衛霍爵重韓彭錫邑增於鄭僑賜乘同於魏絳丹節比司隸之貴
緹綺將金吾之寵座闕倡歌之娛堂無鐘鼓之奏辭功坐樹不伐征西之
勲還第角巾無競龍驤之賞銘曰惟岳降神膺期命世量苞川數道弘兼
濟昴宿協符佐旌真契匪躬諒直武節橫厲函嶺重險鍾鼎淪覆潛龍勿
用瞻烏在屋道贊上台功臣下瀆條教斯理彛倫載睦懋官惟德明試以
功既移上將實董元戎傳呼甚寵徽章載隆居高能降處貴思冲寶命惟
新王猷允塞爵班異姓禮均同德林胡以南易州之北帝曰爾諾俾侯燕
國駸駸過隙滔滔逝川明哲詎寶館舍長指立言不沒遺愛在旃三河斤
土駟馬開泉丹旒毀宗玄堂啓殯寵贈虛加鸞和空引晏子悼齊隋武懷
晉謂天蓋高如何不憇表陳沈炯為陳太傅讓表曰秦六代之舞不能
祚天具百神之歌無以動聖延首當闔轉增危慄百川沸騰百室如燬釋
位同謀諸侯揔至盟書會府餘臣一人若使幅巾衡巷口絕平吳朝遊赤
松暮過濟北出就侯服入褫龍章則四郊有壘誰守社稷如其雄戟在前
強弩自衛負孺子之圖飾綠鵠之昂軍威重於護將國禮貴於寒門則臣

道尚卑執云非逼臣所以出謝公卿入訓妻子拜長陵之園謁太祖之廟不以九族違恩義不以百姓負國家所期陛下與此極同壽朝廷與南山同固

太保

應劭漢官曰太保古官保養也 呂氏春秋曰荆文王得茹黃之狗死路之贈以田於雲夢三月不返得丹陽之姬暮年不聽朝保申曰先王以臣為保今王暮年不聽朝王之罪當笞王伏臣將笞王王曰敬諾保申束細箭五十跪而加之于背如此者再謂王曰起矣王曰有笞之名一也遂致之保申曰君子耻之小人痛之耻之不變痛之何益保申趨出請死罪文王曰此不殺之過也保申何罪王乃殺茹黃之狗折死路之贈放丹陽之姬兼國三十九保申之力也 賈誼書曰天子處位不端受業不敬教誨諷誦書禮不經不法言語不序凡此其屬太保之任也 王隱晉書曰王字休徵琅邪人泰始元年拜太保三年春御史中丞侯史光上言曰祥

孫讓不從所執此非有司所得議也 齊職官儀曰太保品秩冠服同太宰成王即位召公為太保召誥云越三日戊申太保朝于洛 逸禮曰大公為太師周公為太傅召公為太保 沈約宋書曰太師太傅太保為三公訓護天子導以德義天子加拜待以不臣之禮非人則闕矣漢制保傅在三公上號曰三公自後常然 碑 周王褒太保吳武公尉遲綱碑銘曰昔者王室藩屏周德謂之宗親列國諸侯異姓稱為伯舅元勳懿德姬宗齊楚之霸疏爵疇庸漢重韓吳之秩司勳載其洪烈典冊備其徽章山甫式列辟之功絕迹庸器莊叔匡成獻之難昭德彝鼎鴻名盛業公實兼焉公命世挺生應期間出嵩華峻極降惟岳之上靈霜露所均體中和之秀氣危松擢本且觀後彫之質貞桂挺生便體冬華之秀是故以辰昂膺慶風雲玄感者焉公柔順內疑英華外發斧藻仁義珪璋今範危勁之節貫四序而踰秀堅貞之操經百鍊而不銷加以達門射法遠中戟支養由箭神遙穿懸葉巧極將軍之伎精窮校尉之官及年踰艾服任隆台衮甲第當衢傳呼啓路不以寵貴驕人每以卑恭自牧易簪之言無忘寢瘁城郢

之志終於瞑目銘曰珠角應期山庭表德出忠入孝自家刑國人物冠冕
彛章表則任屬屯警官聯極侍行部六條議班二吏逝水詎停光陰不借
遽辭逆旅俄悲恒化旌舒夏練棺陳衛幕北郭人希西山景落三千不見
九原誰作銘茲昂魯永傳嵩霍 又太子太保中都公陸逞碑銘曰公本
居二吳郡三吳縣丞相遜後也宋武匡定鍾鼎底平涵洛公曾祖載實贊
軍謀及反旆南轅以司武留守赫連作亂見拘夏州以江右名家爲中山
太守地旣鮮虞途通靈壽呼沱易水仗武乘邊趙北燕南甲威河外祖營
州使君長於戎馬稱雄朔漢南中都督猶續弈世之基西校國門無墜承
家之業公識度深詳標尚閑遠處衆爲謙居簡行敬風鑒外明潛機內敏
建章門戶張華成立原陵松柏虞延盡記昔處文房又居內職或傳水華
時遊甲邸魏祖軍謀還豫南陔之宴梁王師傅猶對宣室之談出內優隆
通籍榮寵升降榮步便頌官禁銘曰淮海惟揚具區之數水朝江漢星纏
牛斗盛德遺風神明厥後龍竟八命鸞旂四牡賓階昔遇風月相思卿門
今別宿草何悲輪環不已零落無時永矣元伯 隳從此辭 周庾信太保

鴈門公紇干弘碑曰公本姓田氏虞賓在位基於揖讓之風鳳皇于飛經
於親賢之國論其繼世之功則狄城有廟序其移家之始則長陵有碑况
復高廟上書小車而對漢祖聊城祭鳥長兵而驅燕將公以胎教之月歲
德在官誕載之辰星精出昂旣而受書黃石意在王者之師揮劍白猿心
存霸國之用常願執金鼓而問吳王橫琯戈而反齊地有志不就忠貞
死焉銘曰移苗返葬提柩山行靈墟瀧水哀挽長城山如北望樹似東平
松門石起碑字金生耿耿山河亮亮胤子泣血徒步奔波千里孝水先枯
悲雲即起世數存沒哀榮終始

祭酒

韋紹辯釋名曰祭酒者謂祭六神以酒醖之也辯云凡會同饗燕必尊長
先用先用必以酒祭先故曰祭酒漢時吳王年長以爲劉氏祭酒是也
漢書曰張安世薦蘇武明習故事奉使不辱命先帝以爲遺言宣帝即位
時召武侍官者署數進見復爲右曹典屬國以武苦節老臣令朝朔望號
稱祭酒甚優寵之 風俗通曰詩禮春秋至齊襄王時而孫卿最爲老師

齊尚循列大夫之缺而孫卿三爲祭酒也 蜀志曰先主既定益州廣漢太守夏纂請奏密爲師友祭酒 百官表注曰博士祭酒一人掌國子學早朝服進賢兩梁冠佩水蒼玉秦燔書籍而置博士之官博者博通於藝事也 齊職儀曰晉令博士祭酒掌國子生師事祭酒執經葛巾單衣終身致敬 沈約宋書曰博士秦官也 常通古今自多至數十人有僕射光武增爲十五人蓋一經有數家之學故也皆教弟子光武改僕射曰祭酒祭酒者一位之元長也 齊王融爲王儉讓國子祭酒表曰竊以庠均義重振古所崇資師道尊有來攸尚 匪曰蘭芷疇變入室之情不自朱藍何遷素絲之質 又表曰況臣仁慙富似德謝潤身識漏令經器非重何以昇墜道於殊身反斯文於遙日 將使良璣脩竹無增瑩羽敬遜務時遂饗星歲 又表曰臣聞脩危方湛弱露霑而取覆懸衡紀正輕塵委而必移况臣才非應俗用乖知治取其集木飲水旌懸輪鶩方臣之念未足言矣 後魏溫子昇爲安豐王延明讓國子祭酒表曰臣聞寶劍未砥猶之切玉之功美箭闕羽尚無衝石之勢况才非會稽之竹質謝昆吾之金

博士

至於敷教東序流訓上庠置博候酌懸鍾待叩必須蘊朱藍以成彩立規矩以爲式垂三行於貴遊揚六藝於胄子而臣學媿聚沙問慙攻木雖歷文史不治章句於茲曠官青衿何仰

應劭漢官儀曰博士秦官也博者通博古今士者辯於然否孝武帝建元五年初置五經博士太常差次有聰明威重者一人爲祭酒摠領綱紀漢書曰賈誼洛陽人年十八以能誦詩屬書稱於郡中文帝召以爲博士是時年二十餘最爲少每詔令議下諸老先生未能言誼盡能爲之對人人各如其意所出 又曰公孫弘對策時百餘人太常奏弘第居下天子擢之弘對爲第一召入見容貌甚麗拜爲博士待詔金馬門 東觀漢記曰相榮授皇太子經每朝令榮於公卿前說經上曰得卿幾晚因除博士范曄後漢書曰董均永平初爲博士時草創五郊祭祀及宗廟禮樂威儀章服輒令鈞參議多見從用爲當世通儒 李邕別傳曰邕上書太后數陳忠言其辭不能盡施用輒有策詔褒贊焉博士著兩梁冠朝會隨將大

夫例時賤經學博士乃在市長下公奏以為非所以敬儒德明國體也上
善公言正月大朝引博士公府長缺漢舊儀曰武帝初置博士取學通
行脩博識多藝曉古文爾雅能屬文章為高第朝賀位次中都官史稱先
生不得言君其真弟子稱門人又曰孝文皇帝時博士七十餘人朝服
玄端章甫冠晉令曰博士皆取履行清通淳明典義若散騎中書侍郎
太子中庶子以上乃得召試諸生有法度者及曰衣試在高第邦郎中
魯國先賢傳曰漢文帝時聞申公為詩最精以為博士申公為詩傳號曰
魯詩典略曰公儀休者魯博士也為魯相無所變更百官自正使食祿
者不得與下爭利殷氏世傳曰殷亮建武中徵拜博士遷講學大夫諸
儒講論勝者賜席亮重席至八九帝嘉之曰學不當如是耶郭子曰張
憑學孝廉請劉真長還船須吏真長至遣覓張孝廉船同旅愕然既同載
俱詣撫軍劉前進謂撫軍曰為公得一士太常博士之妙選既前撫軍與
之言咨嗟稱善乃曰張憑勃窣為理窟即用為太常博士漢楊雄博
士箴曰典禮是脩盡為辟雍國有學校侯有泮宮名有伋教德用不陵昔

在文王經營其軌勗于德音而思皇多士多士作禎惟周以寧國人興讓
盧茵質成公劉挹行潦洒蜀亂斯清官摻其業士執其經昔聖人之綏俗
莫美於施化故孔子觀夫人之學而知為王之易大舜南面無為而衽席
平還師階間三苗以懷秦作無道斬決天紀漫彼王迹而坑術士梁
丘遲為王博士讓表曰臣聞撫臆可以言心量能則知所上是故矯親魯
門簡業事亡雜吹齊稚分聲遽逝臣才行過汚文質無廉踈達謝於谷社
浹洽乖夫劉揚非除部養之勤豈通掌固之業